

是故諸比丘當學所生子口出法味如是諸
比丘當作是學爾時諸比丘聞佛所說歡喜
奉行

佛說父母恩難報經

當八

十三

佛說新歲經

東晉沙門竺曇無蘭譯

聞如是一時佛在舍衛國祇樹給孤獨園與
大比丘衆八萬四千人俱舍利弗目連等前
後圍繞聽佛說經佛處大會猶如須彌衆山

之王獨峻高顯如月盛滿照于群星威光唯
景如紫金耀於是場地皆作金色卓然特異
巍巍無侶於時世尊與比丘衆俱清淨無量
如日如雲終竟三月以至新歲諸比丘衆寂
然憺怕一心自思念於道定無有異想於是
賢者阿難即從座起偏袒右臂右膝著地長
跪叉手前自歸佛足以偈歎曰
佛尊所以來 遊此以濟護 三月處於斯
祇樹孤獨園 所願以具足 今正是其時
導師無等倫 應宣布新歲

於時世尊聞阿難說偈歎誦至真寂坐一面
告賢者大目犍連汝往詣三千大千世界幽
閑山谷峻頂石室悉遍聲告諸比丘衆始進
舊學逮諸未悟悉使來會於斯祇樹所以者
何如來以到欲立新歲時大目犍連踊在虛
空承佛聖旨而發洪音告于三千大千世界
其大響中自然演偈而說頌曰
仁等所以處 林藪山石間 新歲時已到
心所願當成
時諸比丘所在遊居三千大千世界聞斯偈

告各以神足若干方便變現其身到祇樹園
行詣佛所受立新歲并在佛邊合集弟子各
從異方他土來者一時都會凡八十萬四千
億姪欲受新歲彼時世尊告賢者阿難汝往
擊于犍椎時今已到阿難受教即從座起而
搥犍椎聲徧佛土一佛大國地獄餓鬼畜生
聞犍椎音承佛威神一切諸病苦毒悉除皆
得安隱於時世尊以淨梵音告諸比丘汝等
宜起行舍羅籌各相對悔過自責相謝衆失
所犯非法各忍和同淨身口心令無餘穢時

諸比丘即受佛教各從座起在世尊前各各相謝懺悔所失訖還復坐其本位佛時見眾各還位坐佛垂慈愍因從座起而自叉手向諸比丘言諸比丘眾當和心相向向汝悔過所以者何我身口意儻相違失雖無上尊如來至真無有誤失闕漏之業心不放逸不失智慧無所貪慕不毀禁戒於諸聲聞緣覺中尊德超諸天世間人民三界最長而無等侶又諸比丘言若種姓出家學道修沙門法心性各異志操不同在斯佛業當可施行宜奉

訓誨不得違犯所以者何若有比丘處於聖眾建立新歲身行各異心念不同而懷諛諂計彼比丘不受真正不應具戒所以者何身口意淨乃善真正受佛具戒心抱恭恪順上中下不爲慢恣慙愧下意乃應法戒所以者何如是行者無有怨憎不爲結恨觀古今法無有憤亂建立新歲亦無瞋恚自大之心所以者何戒禁清淨造立新歲建立最大戒不清淨非佛弟子猶如死人屍形在地棄捐塚間天上世間諸天人民各齎良藥神呪好術

當八

十五

愍念療之不能使活如是比丘毀犯禁戒正
使入衆若干新歲不能自救建成新歲所以
者何是人毀戒會歸自然因還獲報地獄餓
鬼畜生苦毒酸楚無量汝勤慎之佛說是法
已即從座起離于草蓐尋時三千大千世界
六反震動篳篥妓樂不鼓自鳴天於虛空雨
衆名香而散雜華佛說是戒法品時告比丘
衆時諸比丘各在本座以佛聖真威神之誨
功勲光明皆以普周各自起立心不復樂在
於常坐山巖樹下唯是爲欲各從座起稽首

佛足口自白言一切諸法皆從佛受聖則道
本爲一切護慈愍之目最尊殊特聖德無上
超絕無侶巍巍堂堂宣布道化於時如來遷
延尊位懺謝聖衆矜愍天下還就草蓐佛適
復座聖衆亦然各就故位復坐如法爾時世
尊見歲時到愍念諸會在比丘前三白令竟
所立畢訖五比丘從座起建立新歲適立新
歲一萬比丘得成道跡八千比丘得阿羅漢
虛空諸天八萬四千咸見開化皆發無上正
真道意講說經法不可計數衆生之類建立

三乘今佛慈哀枉屈至尊處在衆坐度脫危
厄十方蒙濟於時難頭和難龍王各捨本居
皆持澤香栴檀雜香往詣佛所至新歲場歸
命於佛及與聖衆稽首足下以栴檀雜香供
養佛及比丘僧便以斯偈而歎頌曰

言八

十六

其在於山巖 坐於蔭樹下 若遊於大海
而懷饑瞋恨 來坐立新歲 億載衆生集
供養悉奉佛 得成甘露門
於時海龍王齋赤真珠化作上妙交露閣帳
廣長四百里紫金紺琉璃而共合成手執擎

持行虛空中出龍宮上從交露閣八味水池
流清灑地供養如來及比丘衆以交露閣貢
上大聖及比丘僧以珠瓔珞散佛聖衆即說
偈言

清淨如虛空 等一自然無 禁戒最清淨
踰珍妙明珠 無央數衆輩 坐在於大會
悉供養安住 及諸聲聞衆
爾時十方諸菩薩天龍神王各從十方面而
來合會化作若干奇妙供具供養世尊及比
丘衆稽首歸命諮受經典各復如是等無有

異咸來稽首皆發無上正真道意於是天人
各各發心供養世尊及諸聖眾以偈歎曰

其心已清淨 第一無思議 聖眾最尊長

在於會中坐 去離一切想 善除眾垢穢

今日奉供養 所敬不可議 開化掌眾難

一切諸塵勞 其戒禁清淨 猶寶明月珠

常心思惟正 斷眾結瞋恨 今日離垢尊

合會立新歲 誨心難調化 遵行猶太山

消礙常行法 佛安立新歲

時諸天人說是偈已稽首佛足忽然不現各

歸本宮而各欣悅以法自娛於時世尊顯大
陰涼眾寶交露以布聖眾便說此偈

其戒最清淨 所行甚難逮 今日以樂施

覆徧立新歲 貢上安住子 護戒甚清淨

如鵲愛其毛 佛威護新歲

佛告諸比丘今佛世尊雖新歲一年一會修

行法則清淨道護嚴身口意三事無穢奉行

十善四等六度蠲除六情三毒五蓋十二牽

連淨如日出照於天下明暉照耀眾冥消索

入于道明無上正真一切和同苦樂無二乃

應道法佛於是即說頌曰

諸佛興出快

說經法亦快

聖衆和同快

和常得安隱

佛說如是諸比丘衆諸天龍鬼神阿須倫世
間人民聞佛所說莫不歡喜作禮而去

佛說新歲經

佛說群牛譬經

西晉沙門法炬譯

聞如是一時婆伽婆在舍衛城祇樹給孤獨
園爾時業尊告諸比丘譬如群牛志性調良
所至到處擇軟草食飲清涼水時有一驢便
作是念此諸群牛志性調良所至到處擇軟
草食飲清涼水我今亦可教彼擇軟草食飲
清涼水時彼驢入群牛中前脚跑土觸撓彼
群牛亦教群牛鳴吼然不能改其聲我亦是
牛我亦是牛然彼群牛以角觝殺而捨之去